

MEMORANDWM CYDSYNIAD DEDDFWRIAETHOL ATODOL (MEMORANDWM RHIF 2)

Y BIL GOFAL IECHYD (TREFNIADAU RHYNGWLADOL)

1. Gosodir y Memorandwm Cydsyniad Deddfwriaethol hwn o dan Reol Sefydlog ("RhS") 29.2. Mae RhS29 yn rhagnodi bod rhaid gosod Memorandwm Cydsyniad Deddfwriaethol, ac y ceir cyflwyno Cynnig Cydsyniad Deddfwriaethol, gerbron Cynulliad Cenedlaethol Cymru os yw Bil Seneddol y DU yn gwneud darpariaeth mewn perthynas â Chymru at ddiben sydd o fewn cymhwysedd deddfwriaethol y Cynulliad Cenedlaethol, neu sy'n addasu'r cymhwysedd hwnnw.
2. Cafodd y Bil Gofal Iechyd (Trefniadau Rhyngwladol) (y "Bil") ei gyflwyno yn Nhŷ'r Cyffredin ar 26 Hydref 2018 ac mae i'w weld yn: [Bill documents — Healthcare \(International Arrangements\) Bill 2017-19 — UK Parliament](#)

Amcanion Polisi

3. Amcanion polisi datganedig Llywodraeth y DU yw galluogi'r Llywodraeth i ymateb i'r ystod ehangach o ganlyniadau posibl i Ymadael â'r UE mewn perthynas â gofal iechyd cilyddol, gan gynnwys sefydlu cytundebau newydd ar gyfer gofal iechyd cilyddol. Mae'r Bil hwn yn rhan o ymateb deddfwriaethol Llywodraeth y DU i Ymadael â'r UE. Er bod y Bil yn cael ei gyflwyno o ganlyniad i'r penderfyniad i ymadael â'r UE, gallai'r deddfwriaeth gael ei defnyddio hefyd i roi effaith i gytundebau gofal iechyd gyda thrydydd gwledydd eraill.

Crynodeb o'r Bil

4. Noddir y Bil gan yr Adran Iechyd a Gofal Cymdeithasol.
5. Mae'r Bil yn gwneud darpariaeth:
 - I roi pwerau i'r Ysgrifennydd Gwladol i ariannu a threfnu gofal iechyd y tu allan i'r DU;
 - I wneud rheoliadau i roi effaith i drefniadau gofal iechyd rhwng y DU a gwledydd, tiriogaethau neu sefydliadau rhyngwladol eraill megis yr Undeb Ewropeaidd (UE); ac
 - I alluogi i bersonau awdurdodedig gael eu dynodi at ddiben prosesu data, sy'n angenrheidiol i ategu'r trefniadau a'r cytundebau hyn.

Newidiadau i'r Bil ers cyhoeddi'r Memorandwm Cydsyniad Deddfwriaethol cyntaf

6. Gosodwyd Memorandwm Cydsyniad Deddfwriaethol gan Lywodraeth Cymru mewn perthynas â'r Bil ar 15 Tachwedd 2018, yn seiliedig ar y fersiwn o'r Bil a gyflwynwyd i Senedd y DU ar 26 Hydref 2018.
7. Roedd y Memorandwm yn cadarnhau na fyddai modd i Lywodraeth Cymru argymhell i'r Cynulliad ei fod yn rhoi cydsyniad i'r Bil fel y'i drafftiwyd ar y pryd. Er bod Llywodraeth Cymru yn credu bod manteision o gael dull gweithredu cyson ar draws y DU gyfan o ran trefniadau gofal iechyd cilyddol, eglurodd bod ganddi bryderon ynghylch i ba raddau y byddai Llywodraeth Cymru yn rhan o'r gwaith o lywio a llunio'r trefniadau a wneir o dan y Bil.
8. Ers i'r Memorandwm cyntaf gael ei gyhoeddi, mae Llywodraeth y DU wedi ymrwymo i ddiwygio'r Bil er mwyn mynd i'r afael â phryderon Llywodraeth Cymru. Cyhoeddodd y Gweinidog Gwladol dros lechyd wrth Bwyllgor Tŷ'r Arglwyddi ar 21 Chwefror y byddai'r Bil yn cael ei ddiwygio yn y Cyfnod Adrodd. Mae'r Memorandwm Atodol hwn yn egluro sut y caiff y Bil ei ddiwygio a sut yr ymdriniwyd â phryderon Llywodraeth Cymru. Mae Atodiad 1 yn nodi'r effaith y bwriedir i welliant Llywodraeth y DU ei chael.
9. Bydd y gwelliant arfaethedig yn ei gwneud yn ofynnol i'r Ysgrifennydd Gwladol ymgynghori â'r Gweinyddiaethau Datganoledig, gan gynnwys Gweinidogion Cymru, cyn gwneud rheoliadau o dan Gymal 2 sydd o fewn cymhwysedd datganoledig. Yn ogystal â'r gofyniad hwnnw, mae Memorandwm Cyd-ddealltwriaeth wedi cael ei ddatblygu rhwng y Gweinyddiaethau Datganoledig a Llywodraeth y DU i ategu'r gwelliant. Cytunwyd ar y Memorandwm Cyd-ddealltwriaeth gyda'r Gweinidog Iechyd Gwladol ar 20 Chwefror 2019.
10. **Gofyniad i ymgynghori** - Mae Cymal 2 o'r Bil yn rhoi pwerau i'r Ysgrifennydd Gwladol wneud rheoliadau mewn perthynas â Chymal 1, mewn cysylltiad â darparu gofal iechyd y tu allan i'r DU, ac i roi effaith i gytundebau gofal iechyd. Os bydd y DU yn ymadael â'r UE gyda chytundeb, rhagwelir y byddai'r pŵer hwn yn galluogi i drefniadau gofal iechyd gael eu rhoi ar waith gyda'r UE gyfan neu gydag Aelod-wladwriaethau unigol o fis Ionawr 2021 ymlaen neu gyda thrydydd gwledydd. Os na cheir cytundeb, byddai'r Bil yn galluogi Llywodraeth y DU i roi effaith i drefniadau gofal iechyd cilyddol newydd ar y diwrnod ymadael, neu wedi hynny. Er mai cyfrifoldeb y DU fyddai gwneud trefniadau dwyochrog neu amlochrog gyda thiriogaethau eraill a sefydliadau rhyngwladol, caiff y Cynulliad ddeddfu at y diben o ddilyn a gweithredu rhwymedigaethau rhyngwladol y DU mewn perthynas â materion datganoledig, megis gofal iechyd. Bydd y gwelliant a gyflwynwyd gan Lywodraeth y DU yn ei gwneud yn ofynnol i'r Ysgrifennydd Gwladol ymgynghori â Gweinidogion Cymru (a Gweinyddiaethau Datganoledig eraill) cyn gwneud unrhyw reoliadau o dan Gymal 2 sy'n cynnwys

darpariaeth sydd o fewn cymhwysedd deddfwriaethol Cynulliad Cenedlaethol Cymru.

11. **Memorandwm Cyd-ddealltwriaeth** - Er mwyn rhoi'r sicrwydd angenrheidiol mewn perthynas â'i rhan mewn trefniadau gofal iechyd cilyddol, safbwynt Llywodraeth Cymru yw y byddai angen i'r Memorandwm y cytunwyd arno gan Lywodraeth y DU nodi:

- yr ymgynghorid â Llywodraeth Cymru wrth negodi'r cytundebau ac y byddai ganddi ran yn y broses, o'r gwaith cwmpasu cychwynnol hyd at gwblhau cytundeb drafft;
- yr ymgynghorid â Llywodraeth Cymru ar ddatblygiad cychwynnol a drafftio dilynol y rheoliadau o dan y Bil a fyddai'n rhoi'r cytundebau hyn ar waith, gyda Llywodraeth y DU yn gwneud pob ymdrech i fwrw ymlaen mewn consensws â'r gweinyddiaethau datganoledig;
- yr ymgynghorid â Llywodraeth Cymru pan fyddai cytundeb yn berthnasol i Gymru, neu pan fyddai goblygiadau i Gymru, ac ar reoliadau a fyddai'n rhoi effaith i'r cytundeb hwnnw.

12. Yn ogystal â bodloni'r pwyntiau hyn yn llawn, mae'r Memorandwm hefyd yn nodi:

- na fyddai Llywodraeth y DU fel arfer yn gwneud rheoliadau heb sicrhau cytundeb gan Weinidogion y Gweinyddiaethau Ddatganoledig o flaen llaw;
- proses ar gyfer cyfnewid llythyron rhwng Gweinidogion pe na bai modd cael cytundeb gyda'r Gweinyddiaethau Ddatganoledig, lle bo croestorri rhwng rheoliadau o dan Gymal 2 a cymhwysedd datganoledig;
- bod y llythyron hyn ar gael i Ddau Dŷ'r Senedd pe bai'r rheoliadau'n mynd ymlaen i gael eu gwneud gan yr Ysgrifennydd Gwladol dros lechyd a Gofal Cymdeithasol.

13. Caiff y Memorandwm Cyd-ddealltwriaeth ei ddarparu yn Atodiad 2.

14. Roedd y Memorandwm Cydsyniad Deddfwriaethol cyntaf yn nodi yr ystyrir bod Cymalau 1, 2, 4 a 5 o'r Bil yn gofyn am gael cydsyniad ar y sail eu bod yn gwneud darpariaeth at ddiben sy'n ymwneud naill ai'n rhannol neu'n gyfan gwbl â chymhwysedd deddfwriaethol y Cynulliad gan eu bod yn ymwneud ag iechyd. (Mae Cymal 5 yn ychwanegu at y pwerau a arferir o dan Gymal 2 ac yn eu hegluro. Mae Cymalau 3 a 6 yn gwneud darpariaeth ynghylch dehongli, maint a chychwyn at ddibenion y cymalau eraill yn y Bil sy'n gofyn am gael cydsyniad.) Mae manylion y cymalau i' gweld yn y Memorandwm cyntaf yn:

<http://www.senedd.cynulliad.cymru/mglIssueHistoryHome.aspx?lId=23365>

15. Yn ogystal, mae'r cymal newydd, sydd i'w fewnosod ar ôl Cymal 4 yn gwneud darpariaeth at ddiben sydd o fewn cymhwysedd deddfwriaethol y Cynulliad. Mae felly'n ofynnol cael cydsyniad.

Rhesymau dros wneud y darpariaethau hyn ar gyfer Cymru yn y Bil Gofal Iechyd (Trefniadau Rhyngwladol)

16. Fel y nodir yn y Memorandwm Cydsyniad Deddfwriaethol cyntaf, mae Llywodraeth Cymru yn cytuno bod angen deddfwriaeth, ar ôl yr ymadawiad â'r UE, i wneud darpariaeth ar gyfer trefniadau gofal iechyd cilyddol er mwyn rhoi sicrwydd a sicrhad i drigolion y DU. Mae'r trefniadau hyn yn caniatáu i unigolion deithio, gweithio a derbyn triniaeth y tu allan i'r DU, lle na fyddai modd gwneud hynny fel arall, o bosibl. Pe bai'r DU yn ymadael â'r UE heb gytundeb, byddai'n bwysig rhoi sicrhad i drigolion cyn gynted ag y bo modd. Mae brys, felly, o ran amserlen y Bil a'r deddfwriaeth a fydd yn deillio ohono.

17. Er bod Llywodraeth Cymru yn credu bod manteision i ddull gweithredu cyson ar draws y DU gyfan, bydd unrhyw drefniant gofal iechyd a sefydlir ar ran y DU yn effeithio ar y GIG yng Nghymru, felly bydd y deddfwriaeth hon yn cael effaith arwyddocaol ar faes polisi sydd wedi'i ddatganoli.

Safbwynt Llywodraeth Cymru ar y Bil fel y'i diwygiwyd

18. Mae cynnwys Llywodraeth Cymru wrth lywio a llunio'r cytundebau gofal iechyd sydd i'w darparu o dan y Bil a fydd yn cael effaith ar y GIG yng Nghymru yn parhau i fod yn bwysig. Eglurodd Llywodraeth Cymru wrth Adran Iechyd a Gofal Cymdeithasol y DU bod cael sicrwydd deddfwriaethol ac anneddfwriaethol gan Lywodraeth y DU yn angenrheidiol er mwyn sicrhau bod Llywodraeth Cymru yn cael ei chynnwys mewn materion sy'n effeithio ar feysydd datganoledig yng Nghymru. Mae'r sicrwydd hwnnw wedi'i ddarparu ar ffurf gwelliant Llywodraeth y DU i'r Bil a'r Memorandwm Cyd-ddealltwriaeth ategol.

19. Mae'r Gweinidog Iechyd a Gwasanaethau Cymdeithasol wedi datgan, o'u hystyried gyda'i gilydd, fod y gwelliant a gyflwynwyd gan Lywodraeth y DU a'r Memorandwm Cyd-ddealltwriaeth ategol, yn ddigon i alluogi Llywodraeth Cymru i argymhell bod y Cynulliad Cenedlaethol yn rhoi ei gydsyniad deddfwriaethol i'r Bil.

20. Mae'r gwelliant arfaethedig a'r Memorandwm Cyd-ddealltwriaeth yn sicrhau y bydd Llywodraeth Cymru yn cael ymgysylltiad ystyrlon yn y gwaith o ddatblygu cytundebau gofal iechyd newydd ac y bydd Llywodraeth y DU yn bwrw ymlaen â'r gwaith ar sail consensws. Os na fydd modd cytuno ar reoliadau, mae trefniadau cryf sy'n caniatáu i Weinidogion Cymru fynegi barn. Mae hwn yn ganlyniad da sy'n rhoi rôl gref a hyblygrwydd i Weinidogion Cymru ac fe'i sicrhawyd ar ôl llawer o gydweithio effeithiol rhwng y llywodraethau. Mae'n fodel gwerthfawr y gellid ei ddefnyddio mewn meysydd eraill lle mae angen i lywodraethau

gydweithredu ac mae'n arwydd o ymrwymiad y ddwy lywodraeth i gydweithio.

Goblygiadau ariannol

21. Mae costau ariannol ynghlwm wrth drefniadau gofal iechyd cilyddol. Mae'r costau hyn yn ymwneud â threfnu i dalu am driniaeth i drigolion y DU dramor a darparu gofal iechyd yn y DU i bobl nad ydynt yn byw yno. Gallai fod costau uwch neu is gan ddibynnu faint o wledydd y bydd y DU yn sefydlu trefniadau gofal iechyd cilyddol gyda nhw, a natur y cytundebau hyn.
22. Ysgrifennodd yr Arglwydd O'Shaughnessy at Ysgrifennydd y Cabinet dros lechyd a Gofal Cymdeithasol ar 26 Hydref 2018, yn rhoi sicrhad na fydd unrhyw gostau ychwanegol i'r gweinyddiaethau datganoledig mewn perthynas â'r Bil. Eglurwyd ymhellach mewn trafodaeth y byddai unrhyw drefniadau a wneir ar lefel y DU i dalu am ddarparu triniaeth i drigolion y DU dramor yn cael eu hysgwyddo gan Lywodraeth y DU. Fodd bynnag, byddai costau triniaeth gan GIG Cymru i ddinasyddion y DU sy'n dychwelyd i'r DU i fod yn breswlydd fel arfer neu ar gyfer gofal iechyd sydd wedi'i eithrio rhag codi tâl ar bobl nad ydynt yn drigolion yn gorfod cael eu hysgwyddo gan Lywodraeth Cymru, fel sy'n digwydd ar hyn o bryd.

Casgliad

23. Mae'r Memorandwm Cydsyniad Deddfwriaethol Atodol hwn yn disgrifio'r newidiadau perthnasol a wnaed i'r Bil Gofal Iechyd (Trefniadau Rhyngwladol) ers ei gyflwyno, ac mae'n cadarnhau mai safbwynt Llywodraeth Cymru yn awr yw argymhell y cydsyniad hwnnw i'r Cynulliad.

Vaughan Gething AC
Y Gweinidog Iechyd a Gwasanaethau Cymdeithasol
Mawrth 2019

**ATODIAD 1 – MEMORANDWM CYDSYNIAD DEDDFWRIAETHOL
ATODOL: Y BIL GOFAL IECHYD (TREFNIADAU RHYNGWLADOL)**

**GWELLIANT ARFAETHEDIG Y LLYWODRAETH AR GYFER CYFNOD
ADRODD TŶ'R ARGLWYDDI**

Y Cymal a ddiwygiwyd	Effaith
Mewnosodir cymal newydd	<p>Mae'n rhoi gofyniad ar yr Ysgrifennydd Gwladol i ymgynghori â'r awdurdodau datganoledig perthnasol cyn gwneud rheoliadau o dan Gymal 2 ddim ond pan fo'r rheoliadau hynny yn cynnwys darpariaeth sydd o cymhwysedd datganoledig mewn deddfwrfa ddatganoledig.</p> <p>Diffinio awdurdodau datganoledig.</p> <p>Diffinio deddfwrfa ddatganoledig.</p> <p>Diffinio darpariaethau sydd o fewn cymhwysedd deddfwriaethol awdurdodau datganoledig.</p>

**ATODIAD 2 – MEMORANDWM CYD-DDEALLTWRIAETH AR GYFER
YMGYNGHORI O DAN ADRAN 5 O'R DDEDDF GOFAL IECHYD
(TREFNIADAU RHYNGWLADOL)**

A. Cyflwyniad ac egwyddorion hollgyffredinol

1. Mae'r Memorandwm Cyd-ddealltwriaeth hwn yn nodi'r trefniadau a gytunwyd rhwng yr Adran Iechyd a Gofal Cymdeithasol ("yr Adran") a'r gweinyddiaethau datganoledig i fod yn gymorth ar gyfer ymgynghori ystyrion yn unol ag Adran 5 o'r Ddeddf Gofal Iechyd (Trefniadau Rhyngwladol) ("y Ddeddf"). Mae'r Adran yn cydnabod bod gan y gweinyddiaethau datganoledig ran bwysig i'w chwarae pan fo trefniadau i hwyluso triniaeth y tu allan i'r DU a gweithredu cytundebau gofal iechyd yn ymwneud â materion datganoledig.
2. Mae Llywodraeth y DU a'r gweinyddiaethau datganoledig wedi ymrwymo i ddarparu polisi gofal iechyd cilyddol sy'n gweithio ar gyfer pob rhan o'r DU. Bydd yr Adran yn gweithio gyda'r gweinyddiaethau datganoledig, gan gynnwys y Swyddfeydd Tiriogaethol fel y bo'n briodol, i gyflawni'r amcan hwn.
3. Bydd Llywodraeth y DU a'r gweinyddiaethau datganoledig yn gwneud pob ymdrech i fwrw ymlaen ar sail consensws er mwyn sicrhau system gofal iechyd gilyddol sy'n gyson.
4. Mae adran 5 o'r Ddeddf yn ei gwneud yn ofynnol i'r Ysgrifennydd Gwladol ymgynghori â'r awdurdod datganoledig perthnasol cyn gwneud rheoliadau o dan gymal 2 sy'n cynnwys darpariaethau sydd o fewn cymhwysedd deddfwriaethol deddfwrfa ddatganoledig.
5. Nid yw adran B o'r Memorandwm Cyd-ddealltwriaeth hwn wedi ei chyfyngu i ymgynghori yn unol ag Adran 5 o'r Ddeddf. Mae adran C yn ymwneud â'r gofyniad i ymgynghori yn Adran 5 o'r Ddeddf.
6. Ategir y trefniadau a nodir yn y Memorandwm Cyd-ddealltwriaeth hwn drwy ymgysylltiadau rheolaidd rhwng swyddogion yr Adran a swyddogion y gweinyddiaethau datganoledig, a fydd yn gymorth ar gyfer ymgysylltiadau Gweinidogol. Cydnabyddir y bydd effeithiolrwydd y trefniadau hyn yn dibynnu ar barch gan y naill a'r llall at gyfrinachedd yr wybodaeth a gyfnewidir.
7. Bydd y Memorandwm Cyd-ddealltwriaeth hwn, i'r graddau y mae'n ymwneud â chytundebau gofal iechyd cilyddol, yn gymwys os yr Adran yw

adran arweiniol llywodraeth y DU sy'n negodi cytundeb o'r fath. Bydd egwyddorion y Memorandwm Cyd-ddealltwriaeth hwn yn gymwys hefyd i gytundebau gofal iechyd nad ydynt yn ei gwneud yn ofynnol i'r Ysgrifennydd Gwladol wneud rheoliadau o dan Adran 2 o'r Ddeddf. Nid yw'r Memorandwm Cyd-ddealltwriaeth hwn yn rhwymo mewn cyfraith ac nid yw'r trefniadau y mae'n eu nodi yn estyn y ddyletswydd statudol i ymgynghori yn Adran 2 o'r Ddeddf.

8. Nid yw'r Memorandwm Cyd-ddealltwriaeth hwn yn effeithio ar unrhyw gytundebau neu drefniadau gofal iechyd yr ymrwymwyd iddynt a/neu y mae un o Weinidogion Gweithrediaeth Gogledd Iwerddon i ymrwymo iddynt gyda Gweriniaeth Iwerddon.¹

B. Llunio Polisi a Negodiadau

9. Bydd yr Adran yn trafod gyda swyddogion y gweinyddiaethau datganoledig ei chynigion polisi am y cyfeiriad strategol ar gyfer trefniadau gofal iechyd cilyddol newydd ac unrhyw asesiadau meintiol rhagamcanol o effaith y cynigion hynny. Bydd ymgysylltu o'r fath yn digwydd cyn gynted ag y bo modd mewn cyfnod ffurfiannol yn y broses o ddatblygu polisi. Bydd Gweinidogion yr Adran yn ysgrifennu at Weinidogion y gweinyddiaethau datganoledig i nodi'r cynigion polisi y maent yn eu cymeradwyo er mwyn creu consensws ynglŷn â'r cyfeiriad i'w gymryd mewn negodiadau. Nid yw rhannu'r polisi hwn yn rhwymo penderfyniadau Llywodraeth y DU.
10. I gefnogi'r broses o lunio polisi, bydd y gweinyddiaethau datganoledig yn darparu sylwadau amserol i'r Adran ar y dogfennau a rennir ac unrhyw wybodaeth neu ddadansoddiad sy'n berthnasol i fod yn sylfaen i werthusiadau'r Adran o'r trefniadau presennol a'i hasesiadau effaith rhagamcanol.
11. Bydd yr Adran yn ceisio cael mewnbwn y gweinyddiaethau datganoledig ynglŷn â'i safbwyntiau negodi ar gyfer cytundebau gofal iechyd newydd i'r graddau y bônt yn ymwneud â materion sydd o fewn eu cymhwysedd datganoledig. Dylai Gweinidogion yr Adran a Gweinidogion y gweinyddiaethau datganoledig fod yn barod ar gyfer ymgysylltiadau rhynglywodraethol ar fyr rybudd i fodloni'r terfynau amser rhyngwladol.
12. Bydd yr Adran yn trafod unrhyw gytundebau model neu ddrafftiau cychwynnol o gytundebau a ddrafftwyd gan yr Adran gyda'r

¹ Yn unol â chyfranogi yng Nghyngor Gweinidogol y Gogledd a'r De, y Cyngor Prydeinig-Gwyddelig neu mewn perthynas â gweithgareddau Cyrff Gweithredu y Gogledd a'r De a sefydlwyd ar sail Lllyn Dau o Gytundeb Belfast.

gweinyddiaethau datganoledig cyn iddynt gael eu rhannu â thrydydd gwledydd.

13. Bydd yr Adran yn darparu diweddariadau i'r gweinyddiaethau datganoledig am hynt y negodiadau.
14. Bydd yr Adran yn rhannu gwybodaeth berthnasol sy'n ymwneud â chytundeb, pan fyddid wedi dod iddo, gyda'r gweinyddiaethau datganoledig, i sicrhau y bydd yn cael ei weithredu'n briodol ac yn llwyddiannus.
15. Bydd swyddogion yr Adran yn hysbysu swyddogion y gweinyddiaethau datganoledig mor fuan â phosibl os bydd unrhyw un neu rai o'i chynigion polisi neu unrhyw gytundebau gofal iechyd yn ei gwneud yn ofynnol i'r Ysgrifennydd Gwladol wneud rheoliadau o dan Adran 2 o'r Ddeddf ac yn nodi ei rhesymau.
16. Bydd yr Adran yn trafod unrhyw gynigion ar gyfer adolygu neu ddiwygio cytundebau gofal iechyd a weithredwyd gyda'r gweinyddiaethau datganoledig yn unol â'r trefniadau a nodir uchod. Bydd y gweinyddiaethau datganoledig yn darparu i'r Adran sylwadau amserol a data, gwybodaeth a dadansoddiadau sy'n berthnasol i fod yn sylfaen i adolygiadau.

C. Drafftio Rheoliadau o dan Adran 2 o'r Ddeddf

17. Bydd swyddogion yr Adran yn rhannu fersiynau drafft o unrhyw reoliadau y mae Adran 5 yn gymwys iddynt gyda'r gweinyddiaethau datganoledig cyn eu cwblhau er mwyn rhoi cyfle i drafod y cynnwys a gwaith drafftio'r darpariaethau a fyddai o fewn cymhwysedd deddfwriaethol deddfwrfa ddatganoledig.
18. Rhennir drafft terfynol o'r rheoliadau y mae Adran 5 yn gymwys iddynt gyda Gweinidogion perthnasol y gweinyddiaethau datganoledig mor fuan â phosibl a chyn iddynt gael eu gosod.
19. Bydd Llywodraeth y DU yn gwneud pob ymdrech wrth wneud rheoliadau y mae Adran 5 o'r Ddeddf yn gymwys iddynt i fwrw ymlaen ar sail consensws ac ni fydd fel rheol yn gwneud rheoliadau na chytunwyd arnynt gyda'r Gweinidogion o'r gweinyddiaethau datganoledig.
20. Os na ellir dod i gytundeb, bydd cyfnewid llythyrau rhwng y Gweinidogion. Byddai hynny'n rhoi cyfle i weinyddiaeth ddatganoledig nodi ei safbwynt, ac i'r Ysgrifennydd Gwladol esbonio'r rhesymau dros ffurf derfynol y rheoliadau a'r modd y mae Llywodraeth y DU wedi ceisio dod i gytundeb.

Os yw'r Ysgrifennydd Gwladol yn penderfynu bwrw ymlaen â gwneud y rheoliadau, ac yntau'n cael ei arwain gan egwyddorion y Cytundeb Rhynglywodraethol, dylai'r llythyrau a gyfnewidiwyd gael eu rhoi ar gael i ddau Dŷ'r Senedd pan gaiff y rheoliadau eu gosod.

D. Rheoliadau a wneir gan y Gweinyddiaethau Datganoledig

21. Bydd cymhwyso'r egwyddorion yn Adran B o'r Memorandwm Cyd-ddealltwriaeth hwn yn sicrhau bod y gweinyddiaethau datganoledig yn ymwybodol o unrhyw reoliadau cydategol y bydd yn rhaid eu gwneud ochr yn ochr â'r rheoliadau a wneir gan yr Ysgrifennydd Gwladol o dan Adran 2 o'r Ddeddf. Yn unol â hynny, bydd y gweinyddiaethau datganoledig yn gwneud y newidiadau deddfwriaethol angenrheidiol y mae eu hangen i sicrhau bod system gofal iechyd gilyddol sy'n gyson.
22. Er mwyn sicrhau cysondeb ledled y DU pan fo'n bosibl, bydd swyddogion y gweinyddiaethau datganoledig yn trafod gyda swyddogion yr Adran gynnwys a gwaith drafftio unrhyw reoliadau y maent yn bwriadu eu gwneud i weithredu cytundeb gofal iechyd cilyddol mor fuan ag y bo'n ymarferol cyn i'r rheoliadau gael eu gosod.

E. Gweithredu Gweithredol

23. Bydd swyddogion yr Adran yn cysylltu â swyddogion y gweinyddiaethau datganoledig i sicrhau bod gweithrediad gweithredol y polisi gofal iechyd cilyddol yn gweithio ar gyfer pob rhan o'r DU. Gall hyn gynnwys, er enghraifft, ddatblygu a chydgysylltu pecynnau cyfathrebu pwrpasol i hysbysu unigolion a darparwyr gofal iechyd am gytundebau gofal iechyd cilyddol newydd.

F. Adolygu

24. Adolygir y Memorandwm Cyd-ddealltwriaeth hwn cyn pen 24 mis ar ôl y dyddiad y cytunir arno, a bydd dyddiadau unrhyw adolygiadau dilynol i'w trefnu yn ystod yr adolygiad. Caiff yr adolygiad hwn ei gynnal gan swyddogion a'i gytuno gan y Gweinidogion.